

# Renosterstropery

Het jy geweet dat al die renosterspesies in die wêreld **bedreig** word en dat baie van hulle al amper uitgesterf het? <sup>1</sup> Al [renosters](#) wat vandag nog oor is, is twee spesies wat in [Afrika](#) bly (die swart- en witrenoster) en drie spesies wat inwoners van Asië is. Dit is die Indiese eenhoring-, die Sumatraanse en Javaanse renoster. Die Sumatraanse, Javaanse en swartrenoster word krities bedreig. Dit beteken dat daar 'n werklike gevaar is dat hulle heeltemal kan **uitsterf** ...



Daar is wetgewing wat renosters beskerm, en die internasionale handel van renosterhoring word verbied, maar ten spyte van die swaar strawwe wat **renosterstropers** opgelê word, word daar steeds op renosters jag gemaak.

[Suid-Afrika](#) is bevoorreg dat ons wit- en swartrenosters het, maar ongelukkig beteken dit ook dat ons swaar deur stropers geteiken word. 'n Renosterstroker is 'n wilddief wat op renosters vir hul horings jag maak. <sup>2</sup> 'n Mens noem die jag op renosters vir hul horings **renosterstropery**. Daar word beraam dat ongeveer 10 000 Afrika-renosters in die laaste dekade weens stropery dood is. <sup>3</sup>

In 2022 is 448 renosters in Suid-Afrika vir hul horings doodgemaak in vergelyking met 2021 se 451 en 2020 se 394. In 2019 is 594 renosters doodgemaak.

Die [Wêreldnatuurfonds \(WWF\)](#) sê renoster**bevolkings** word deurlopend bedreig, en daar is net een manier om dit te beveg: as alle wetstoepassingsagentskappe saamwerk om dit te beveg. <sup>4</sup>



## Die krisis

Die renosterstroperykrisis het in Zimbabwe begin waar die moeilike sosio-ekonomiese omstandighede en politieke klimaat 'n teelaarde vir misdaad geskep het. Nadat renosters in Zimbabwe gestroop is, het stropers besef dat die grootste bevolking van renosters in Suid-Afrika is en dat hier baie geleenthede vir hulle is.

Dit het tot die groot stroperykrisis in Suid-Afrika gelei. Die land het vanaf 2007 tot 2014 'n enorme styging in renosterstropery gesien. Daar was 'n groei van meer as 9 000%. Die meeste gevalle het in die Krugerwildtuin plaasgevind, maar dit lyk asof die fokus van stropers nou na kleiner reservate verskuif het.

Die Nasionale Krugerwildtuin is Suid-Afrika se belangrikste **wildreservaat**. Dit strek oor twee provinsies, Limpopo en Mpumalanga, en grens in die noorde aan Zimbabwe en in die ooste aan [Mosambiek](#). Dit is een van die grootste wildbewaringsgebiede in Afrika en ongeveer 2 miljoen hektaar groot. <sup>6</sup>



Die wildtuin se renosters was al herhaaldelik deur stropers geteiken, en hul bevolking is 'n groot slag toegedien. Die regering en internasionale skenkers het die laaste paar jaar meer en meer geld en hulpbronne aan die park bewillig om dit veiliger vir renosters te maak, maar ten spyte van al die pogings vind stroping steeds plaas.

Dis ook nie net Suid-Afrika en Zimbabwe se renosters wat geteiken word nie. In 2013 het die renosterstroperykrisis ook na nog van ons buurlande, soos Kenia en [Namibië](#), uitgekring. In Kenia is 59 renosters in 2013 doodgemaak. Dit is meer as 5% van hul nasionale renosterbevolking.



## Skoksyfers

- Die Krugerwildtuin se renosters se bevolking het sedert 2010 met 70% afgeneem. Daar was eens meer as 10 000, en vandag is daar minder as 3 000 renosters oor. <sup>7</sup>
- Daar word beraam dat daar slegs 76 Javaanse renosters in die wêreld oor is, terwyl daar ook minder as 80 Sumatraanse renosters is.
- Ongeveer 6 100 swartrenosters is nog oor, en minder as 16 000 witrenosters lewe nog. Die eenhoringrenoster se bevolking word op 4 000 beraam. <sup>8</sup>



## Renosterhorings se gewildheid

Hoekom word renosterhorings gestroop? Die eenvoudige antwoord is geld. Die horings het groot waarde, en stropers kan dit vir baie geld verkoop. Renosterhorings het al vir tot 65 000 dollar per kilogram verkoop. Dis meer as wat [goud](#) kos! Die prys het darem oor die laaste jare tot nagenoeg 20 000 dollar per kilogram gesak, maar dit is steeds baie geld. <sup>9</sup>



'n Renosterhoring is eintlik slegs 'n bron van keratien - 'n proteïen wat in die hare, naels en vel van soogdiere voorkom - maar baie mense glo dat dit allerlei siektes kan genees, en daarom is dit so gesog. Renosterhorings word glo al vir meer as 2 000 jaar in tradisionele Chinese medisyne gebruik om kwale soos rumatiek, jig en koors te behandel. Daar is ook al geglo dat dit 'n kuur bied teen slangbyte, naarheid en voedselvergiftiging. Daar is ook mense wat glo dat dit as 'n seksuele stimulant kan dien, hoewel daar geen bewyse daarvoor is nie.

In sekere kulture word dit ook as 'n statussimbool gesien en 'n manier om jou sukses en rykdom te wys. As hulle renosterhoring aan iemand as geskenk gee, wys dit op hul **welvaart**.

Daar is dus talle mense wat renosterhorings soek, en omdat die internasionale handel al sedert 1977 verban is, wend mense hulle tot die onwettige verkryging en handel daarin.



## Stropers

Stropers is gewoonlik hoogs gewapend en baie gevaarlik. <sup>10</sup> Stropers het gesofistikeerde toerusting om renosters te jag en dood te maak. Hulle gebruik dikwels 'n **verdowningsmiddel** om die renoster plat te kry, en dan saag hulle die horing af. As die renoster dan wakker word, bloei hy hom dood. Dis 'n stadige en pynlike dood.

As hulle gevang word, moet hulle in die hof verskyn op aanklag van stroping, en 'n regter moet dan besluit of hulle skuldig is of nie en hulle dan **vonnis**. Die vonnisoplegging wissel na gelang van die omvang van die stropery. Mike Nyathi, 'n Mosambieker met Suid-Afrikaanse burgerskap, is byvoorbeeld in 2022 tronkstraf van 53 jaar opgelê. Dit is omdat hy aan 12 aanklagte van stropery skuldig bevind is. <sup>11</sup>



## Renosterfeite

- Renosters kom in die suide en ooste van Afrika sowel as in tropiese Asië voor. <sup>1</sup>
- Hulle kan tot 4,3 m lank word en ongeveer 2 m skouerhoogte bereik. Volwasse renosters weeg tot 4 ton.
- Hulle het kort, stewige bene en het drie tone aan elke poot. Hulle het 'n dik vel en is gewoonlik grys of bruin. <sup>1</sup>
- Hulle het amper geen hare nie, maar net kort stoppels aan die bopunt van die stert en kort haartjies om die ore.
- Hulle is **herbivore** en eet gewoonlik gras en blare. <sup>1</sup>
- Renosters het klein oë, en hulle kan nie baie ver sien nie. Hul gehoor en reuksin vergoed egter hiervoor.
- Al is hulle so groot, kan hulle verbasend vinnig hardloop, tot 45 km per uur.
- Hulle is geneig om mense te vermy, maar as jy te naby aan 'n wyfie met kalfies kom, sal sy jou moontlik bestorm. <sup>1</sup>
- Die swartrenoster (*Diceros bicornis*) het 'n oorhangende, gepunte boonste gryplip waarmee dit blare en bossies afstroop, en die witrenoster (*Ceratotherium simum*) het weer plat, reguit lippe en 'n duidelike boggel op die skouers.
- Die ander drie spesies bly in Asië. Die Javaanse renoster *Rhinoceros sondaicus* is die mees **bedreigde spesie** en het een horing.
- Die Sumatraanse renoster *Dicerorhinus sumatrensis* is die kleinste van die spesies. Hulle het twee horings, swem goed en het meer hare as hul ander renosterfamilie.

- Die Indiese eenhoringrenoster *Rhinoceros unicornis* het, soos die naam sê, een horing en dik vellae wat amper soos skilde lyk.



## Woordbank

<b>bedreig</b>	'n Gevaar wees vir iets of iemand <sup>13</sup>
<b>bedreigde spesie</b>	Diere of plante wat 'n gevaar staan om heeltemal te verdwyn <sup>13</sup>
<b>bevolkings</b>	Die inwoners van 'n land of plek <sup>13</sup>
<b>herbivore</b>	'n Dier wat hoofsaaklik plante eet
<b>renosterstropers</b>	Dis 'n wilddief wat op renosters jag maak vir hul horings <sup>13</sup>
<b>uitsterf</b>	As iets nie meer bestaan nie <sup>13</sup>
<b>verdowningsmiddel</b>	'n Chemiese middel
<b>vonnis</b>	Dit is die straf wat die hof oplê aan iemand wat aan 'n misdaad skuldig bevind word <sup>13</sup>
<b>welvaart</b>	Die voorspoed of rykdom van mense <sup>13</sup>
<b>wildreservaat</b>	Dit is 'n uitgestrekte stuk grond, soms 'n hele landstreek, wat nooit deur die mens ontwikkel is nie en waarop die wilde diere en plantegroei wat oorspronklik daar was, bewaar word of heringevoer word. <sup>13</sup>

## Lees hierdie artikels om nog meer te leer renosterstropery

- [Beskerm renosters](#)
- [Meer oor stropery](#)
- [Statistiek oor renosterstropery](#)

## Kyk hierdie video's om nog meer te leer

# **oor renosterstrophy**

**Leer hier meer oor renosters**

**Kyk die kalfie en sy pappa!**

**Red die swartrenoster**